

淳化县志

一
函
四
冊
函

淳化縣志卷二十三

知縣事南州萬廷樹重修

金石略第十六

宋

學校八行八刑碑

准大觀元年三月十九日封中書省據學制局狀准本局承
受送到內降奉御筆一道學以善風俗明人倫而人材所自
出也今有教養之法而未有善俗明倫之制殆未足以兼理
天下孔子曰其爲人也孝弟而好犯上者鮮矣不好犯上而
好作亂者未之有也蓋設學校置師儒所以敦孝悌孝悌興

則人倫明人倫明則風俗厚而人材成刑罰措朕考成周之
隆教萬民而賓興以六德六行否則威之以不孝不悌之刑
比已立法保任孝悌婣睦任恤忠和之士去古綿邈士非里
選習尙科舉不孝不悌有時而容故任官臨政趨利犯義詆
訕貪污無不爲者此官非其人士不素養故也近因餘暇稽
周官之書制爲法度頒之學校明倫善俗庶幾於古諸士有
善事父母爲孝善兄弟爲悌善內親爲睦善外親爲婣信於
朋友爲任仁於州里爲卹知君臣之義爲忠達義利之分爲
和其有孝悌睦婣任恤忠和八行見於事狀著於鄉里耆鄰
保伍以行實申縣縣令佐審察延入縣學考驗不虛保明申

州如令諸八行孝悌忠和爲上睦嫺爲中任恤爲下士有全
備八行保明如令不以時隨奏貢入太學免試爲文學上舍
司成以下引問考驗較定不誣申尙書省取旨釋褐命官優
加拔用有全備上四行或不全一行而兼中二行爲州學上
舍上等之選不全上二行而兼中一行或不全上三行而兼
中二行者爲上舍中等之選不全上三行而兼中一行或兼
下行者爲上舍下等之選全中三行或中一行而兼下一行
者爲內舍之選餘爲外舍之選諸士以八行中三舍之選者
上舍貢入內舍在州學半年不犯第二等罰升爲上舍外舍
一年不犯第三等罰升爲內舍仍准上法諸士以八行中上

舍之選而被貢入太學者上等在學半年不犯等三等罰司
成以下考驗行實聞奏以太學貢士釋褐法取旨推恩中等
以太學中等法待殿試年推恩下等依太學下等法諸士以
八行中選在州縣若太學皆免試補爲諸生之首選充職事
及諸齋長諭諸以八行考試爲上舍上等其家依官戶法中
下等免戶下支移折變身丁內舍免支移身丁 諸謀反謀
叛謀大逆子孫同及詆訕宗廟指斥乘輿爲不忠之刑惡逆
詛罵祖父母父母別籍異財供養有闕居喪作樂自娶釋服
匿哀爲不孝之刑不恭其兄不友其弟姊妹叔嫂相犯罪杖
爲不悌之刑殺人略人放火強姦強賊若竊盜杖及不道爲

不和之刑謀殺及賣略總麻以上親毆告大功以上尊長小
功尊屬若內亂爲不睦之行詛罵外祖父母與外祖有服親
同母異父親若妻之尊屬相犯至徒違律爲婚停妻娶妻若
無罪出妻不爲姍之刑毆受業師犯同學友至徒應相隱而
輒告言爲不任之刑詐欺取財罪杖告囑耆鄰保伍有所規
求或告事不干已爲不恤之刑諸犯八刑縣令佐州知通以
其事目書於籍以報學應有入學按籍檢會施行諸士有犯
不忠不孝不悌不和終身不齒不得入學不睦十年不姍八
年不任五年不恤三年能改過自新不犯罪而有二行之實
者鄰保伍申縣縣令佐審察聽入學一年又不犯第三等罰

聽齒於諸生之列 宋大觀二年四月十五日將仕郎耀州
華原縣主簿管勾學司權淳化縣簿尉臣鄭仲光書從事郎
知耀州淳化縣事管勾學事兼管勾勸農公事臣劉云立石
明

宸翰碑樓記

馬理

雙溪馬侯宰淳化三年承皇上德意刊宸翰諸碑於學宮仍
繕樓以護之圖不朽也於時流亡集矣賦稅完矣訟繁而簡
矣俗奢而儉矣遂營諸公工城城郭作學宮坊門於外扁曰
桂林倉於其內扁曰育才遂新譙樓縣堂吏舍及他廨宇役
亦繁矣今獨曰宸翰碑樓者尊宸翰也蓋是時皇上立本建

極君師天下嘗於萬幾之暇親灑宸翰著敬一箴一篇又注程氏視聽言動箴四篇又注范氏心箴一篇皆頒諸天下學宮碑勒石傳遠示天下後世咸知皇極敷言皆帝王心學所寓於以世訓世行而近天子之光焉其啓迪斯世之意周矣至矣是故侯殫心而圖之惟恐弗稱上意非知所重者耶淳化丞埒士夫曰凡人之行私精而公恟率假義而取利焉侯之興是役也視宸翰之所在如天顏之所在擇石蠲工視琢及礪及書及勒以自盡焉至於諸役一以家事視之用資於刑徒贖金官民無取焉其視諸細斂以集事頓取以自利者大有間矣君子曰侯得君子之道三焉其事上也忠其使下

也惠其處己也廉宜夫人之與矣夫或曰桂林雅乎君子曰
宵雅肄三官其始也大學之教固如是耳侯名崇字德夫四
川雙流人由麻城學諭來宰於茲淳化丞者四川南州蘇伯
珠字文光也

初置學田碑記

歐陽煖

余乙未秋奉命綰淳化符嘗以作興學校爲兢兢第淳邑設
在山僻地瘠民貧以故諸生困乏者視他邑更甚督學臧公
視秦學之明年沛然布德意發積廩各百金於郡邑令置學
田以濟貧窶惟淳邑先焉豈公業知關中多貧士而淳庠又
甚耶余奉命惟謹移示召買又巡行郊外察地之肥磽疆界

附郭後及四隅越二十里雖饒地弗收必承佃得不者雖
近弗取越數月得地若干畝籽粒若干石夏秋兩稅責在承
佃者規模大概可以永久猶恐歲久地界易湮於是鐫石
爲記仍以租數糧石及原賣承種姓名詳勒碑陰大抵學田
創之難守之尤難創之難難在規畫當而不貽後有司之累
守者之難難在奉行久而不失前有司之意余承命置田不
啻詳已假令官此土者託邊儲爲急不遑征收任佃戶逋負
輒置弗問則其責在官佃此田者或歲豐視爲利藪或偶歉
故爾拖欠甚至負稅逃亡鄰界侵奪則其咎在民若催征勤
矣輸納完矣而士不能守恬淡之節非婚喪大事饑寒切身

不時求給此其責又不在官不在民而在士學田之設乃所以養士非士之所以自養也簞瓢陋巷纓絕踵決古人安貧類如此然則貧何足爲士病士亦何必以貧自病哉惟是勉勵力學砥礪名節異日離蔬釋蹻爲國家用庶不負督學置田至意不然垂養士之良法鮮自養之實效卽日取學租而賑之於國家何補斯不特諸士之羞蓋亦有司之憂也萬厯歲次壬寅夏月日

節愛堂題辭

太守名與
時俱無考

太守吳六泉氏來守關中再逾年而廉之民風猶泯泯也反而尤之吏治焉以吏治之趨日下而品弗齊也乃折衷以聖

人之言爲之忠告云夫今之爲吏之弊者大較有四曰貪曰
酷曰諂曰傲而已有一於是罪何能逭不爾且將壞名昔李
文靖公沆宋賢相也猶云論語中如節用愛人一句尙未能
行終身誦之可也噫非文靖身體而默識亦豈知其真有未
能耶大哉聖言義斯備矣蓋惟節用則必視國猶家而不貪
矣惟愛人則必視民如傷而不酷矣惟不貪則其志卓而何
所於諂惟不酷則其氣平而何所於傲二善立而四弊祛非
聖人之言其孰與於此余自作縣厯州以至今官每以是存
心出政而愧於未能抑覺其得力處亦頗在是乃思與諸君
子共之而以名其聽政之堂誠欲諸君子誦法聖言直與文

靖之賢爲有餘余以一日長得以樂觀厥成是名堂之意也
乃若知我罪我吾無必焉耳矣

重修城隍廟碑記

羅廷繡

邑人

廟故在縣治北門臨通衢寢廟薄西山城麓下北臨廢倉正
德末臬副何公以學宮卑隘將遷學而易其廟邑父老僉曰
學可遷而廟不可以仍緣前址移廟足矣於是遷殿宇於前
時底法爾嘉靖中禩吾祖福翁創橋畢乃構饗堂三楹於前
竹軒袁公作翼室附高祿諸祠於其中葛古川則於殿基朽
之辛亥間余敘承德公與張拱漢韓廷良輩思嗣其業作臬
門門圈三洞刻鏤其上若樓臺狀以故臬門拆爲應門鐘樓

一入應門左鼓樓一入應門右周繚以牆牆砌以磚堅且麗
矣已而張韓輩礮石覆屋於臯應門之中懇余爲記余展謁
進告曰諸君子謂廟制備乎張韓輩曰我等竭駑力以效尺
寸未有所知余曰臨軒無蔽弗嚴也齋宿無所弗虔也若等
其謂何衆皆曰敢不饒爲行觀厥成焉夫城隍之義繫於泰
祀國之有社祭之有蜡神兼主之故春而祈穀秋而報成於
斯萃焉賞不足勸罰不足畏於斯質焉所以禦災捍患彰善
癉惡者恆攸賴也諸君子所思以儆鬼神者有道矣記曰有
其舉之莫敢廢也諸君子得之詩曰夙夜基命宥密於緝熙
單厥心書曰爾克永觀省作稽中德爾尙克羞饋祀則所以

交神之道尙爲諸君子勗之余無能爲役迺聯樂章三闕俾
歌以祀神維廟有門巖巖虎蟠維廟有垣赫赫雲屯神之攸
止培養靈根 維左有鏞雍雍桂叢維右有賁蓼蓼雷封神
之聽之和平保庸 維社有壤匪神曷陳維蜡有迎匪神曷
倫聰明正直統一聖眞享祀不忒降福攸均民之畏威於時
化醇縣令褚公方蒞任聞之曰是有裨於事神治民之道請
識之於是乎記

四公生祠萬民戴德碑記

賈我琪

邑人

皇上龍飛八年鏡照萬方幽微畢徹乃眷西顧特簡諸重臣持
節分理於是大司馬莫公督秦晉大中丞白公撫三秦錢穀

會計則畀阿公明刑弼教則畀穆公既陞辭

帝曰都維茲西土汙萊不治其慎乃成命以往檄下各府州縣
訪一切之不便者與民更始惟我淳邑三輔舊地而疲困滋
甚先年疊遭兵禍饑饉頻仍順治中下懇荒之令二三有司
開報失實以致有賦無地有地無民始則包賠繼而鬻育又
繼而逃亡夫問民疾苦拊摩而噢咻之良司牧責也或矯詔
發粟或四方水旱災傷以告使閭閻隱痛得以上聞而恩澤
因以下究此古大臣之誼秉衡者事也惟是兩臺愛養斯民
行與藩臬二公分疆按部履畝踏荒郡太守劉公又仰承德
意而力行之得捏報之數六百三十四頃四十畝零包科糧

一千五百四十三石零新荒之數三百三十四頃九十畝零
賠糧六百九十一石零既彙報一聞

已而

皇恩大沛甘澤旁敷舉從前之捏報者包賠者新荒者及逃亡
後五六年之積欠者盡行豁免以鹿場蠟戶之淳化轉而
爲光天霽日之淳化以兒啼饑妻號寒嗟萑楚怨批摘之淳
化轉而爲士誦於庠民耕於野之淳化猶是淳化也馬力已
竭猿淚徒哀微兩臺之力烏能使起死而生也哉仰沐仁恩
低徊而不能釋於是相地之曠者得繡衣行署之左鳩工庇
材建爲生祠而祀之而且祝之惟古今祀典有道德仁義之